

Ko te Pukapuka Tuarua a Paora Āpōtoro ki te Hunga o Teharonika Kupu Whakataki

Ngā pōhēhē i manakohia ki te hokinga mai o te Karaiti ka noho tonu hei pūtake whakararu i te hāhi ki Teharonika. *Te Pukapuka Tuarua a Paora Āpōtoro ki te hunga o Teharonika* he whaihanga i te whakapono kua tae noa mai te rā hokinga mai o te Ariki. Ka whakatika a Paora i tēnei whakaaro e mea ana i mua i te hokinga mai o te Karaiti ka rewa ake te tino kino ki tōna ikeike i raro i tētahi kaiārahi hanganga porehu e kīa nei ko “Te Tangata o te Hara” (2.3) koia e ātete ana i a te Karaiti.

E whakataukī ana te Āpōtoro ko te mea nui mō ngā kaipānui kia noho pūmau i roto i tā rātou whakapono ahakoa ngā whakararu me ngā mamae, kia whai mahi hei oranga tinana pērā i a Paora me āna hoa mahi, me te tohe i te mahi pai.

Rāpopoto o Ngā Take

Tīmatanga 1.1-2

Te whakamoemiti me te whakamihi 1.3-12

Ngā tohutohu mō te haerenga mai o te Karaiti

2.1-17

Whakahau ki te whanonga Karaitiana 3.1-15

Whakamutunga 3.16-18

He Mihi

¹ Nā Paora, nā rātou ko Hirawanu, ko Tīmoti –

Ki te hāhi o te hunga o Teharonika i roto i te Atua, i tō tātou Matua, i te Ariki hoki, i a Īhu Karaiti:

² Kia tau ki a koutou te aroha noa me te rangimārie, he mea nā te Atua, nā tō tātou Matua, nā te Ariki hoki, nā Īhu Karaiti.

Te Whakawātanga i te Hokinga Mai o te Karaiti

³ He tika rawa kia whakawhetai mātou ki te Atua i ngā wā katoa mō koutou, e ōku tēina, he mea pai rā hoki ia, nō te mea e neke ake ana tō koutou whakapono, he nui rawa hoki te aroha o koutou katoa, o tētahi ki tētahi.

⁴ I whakamanamana ai mātou ki a koutou i roto i ngā hāhi a te Atua, ki tō koutou ū, ki tō koutou whakapono i ngā whakatoinga katoa i a koutou, i ngā tūkinotanga hoki e whakaririka kau nā koutou.

⁵ He tohu tēnei mō te tika o tā te Atua whakawā, kia kīa ai koutou he tau mō te kīngitanga o te Atua, e mate nei koutou he whakaaro ki tērā.

⁶ Mehemea ia he tika ki te Atua kia utua ki te kino te hunga e tūkinoina ana i a koutou;

⁷ ā, ki a koutou hoki e tūkinotia nā, kia okioki tahi me mātou, i te whakakitenga mai o te Ariki, o Īhu, i runga i te rangi me ngā anahera o tōna kaha,

⁸ i roto i te mura ahi e rapu utu ana i te hunga kāhore e mātau ki te Atua, kāhore nei hoki e ngohengohe ki te rongopai o tō tātou Ariki, o Īhu Karaiti.

⁹ Ko te utu hoki e whakapāngia ki a rātou he whakangaromanga, he mea mutungakore i te aroaro anō o te Ariki, i te korōria anō hoki o tōna kaha.

¹⁰ Ina haere mai ia kia whakakorōriatia i roto i tāna hunga tapu, kia whakamoemititia i roto i te hunga whakapono katoa i taua rā; i whakapono nā hoki koutou ki tā mātou whakaatu i roto i a koutou.

¹¹ Koia nei mātou ka inoi tonu nei mō koutou, kia meinga koutou e tō tātou Atua he tau mō tēnei karangatanga, kia whakaotia anō hoki e ia i runga i te kaha ngā mea katoa i āhuareka ai tōna pai, me te mahi anō hoki o te whakapono,

¹² kia whakakorōriatia ai te ingoa o tō tātou Ariki, o Īhu Karaiti, i roto i a koutou, me koutou hoki i roto i a ia, kia rite ai ki tā te aroha noa o tō tātou Atua, o te Ariki hoki, o Īhu Karaiti.

2

Te Mea Kino

¹ Nā, he mea tēnei nā mātou ki a koutou, e ōku tēina, mō te taenga mai a tō tātou Ariki, o Īhu Karaiti, mō tō tātou huihuinga atu anō ki a ia;

² kei hohoro te rurea o ō koutou hinengaro, kei ohore rānei i tā te wairua, i tā te kupu, i tā te pukapuka rānei e kīa ana nā mātou, e mea ana kua tae tonu mai ināianei te rā o te Ariki.

³ Kei tinihangatia koutou i tētahi mea e te tangata. E kore hoki e tae wawe mai, kia mātua tae mai te takanga atu, kia whakakitea mai anō hoki te tangata o te hara, te tama a te whakangaro.

⁴ He hoariri nei ia, e whakakake ana i a ia ki runga ake i ngā mea katoa e kīa ana he Atua, e karakiatia ana; kia noho ai ia i te whare tapu o te Atua, kia whakaatu ai i a ia ko ia te Atua.

⁵ Kāhore rānei koutou e mahara i ahau anō i a koutou, i kōrerotia e ahau ēnei mea ki a koutou?

⁶ Nā, ka mātau koutou ināianeī ki te mea e ārai ana, kia whakakitea mai rā anō ia a tōna tāima.

⁷ Nō te mea kei te mahi ināianeī te mea huna o te kino, otirā, tērā tētahi kei te ārai ināianeī, kia whakawāteatia rawatia anō ia.

⁸ Ko reira whakakitea mai ai taua tangata kino, e whakangaromia e te Ariki ki te hā o tōna māngai, e whakakāhoretia ki te putanga nui o tōna taenga mai.

⁹ Arā a ia pū, i rite nei tōna taenga mai ki te mahinga a Hātana, i runga i te mana, i ngā tohu, i ngā merekara teka,

¹⁰ i ngā mahi tinihanga katoa hoki o te hē, i roto i te hunga e whakangaromia ana; nō te mea kīhai i riro i a rātou te aroha o te pono, kia ora ai rātou.

¹¹ Mō konei hoki ka tukua atu e te Atua ki a rātou he pōhēhē e mahi ana, kia whakapono ai rātou ki te teka;

¹² kia tukua ai ki te hē te hunga katoa kāhore i whakapono ki te pono, i āhuareka kē ki te hē.

Kua Whiriwhirihia Koutou mō te Ora

¹³ Tika tonu ia kia whakawhetai atu mātou ki te Atua mō koutou i ngā wā katoa, e ōku tēina e arohaina nei e te Ariki, he mea whiriwhiri nā hoki koutou nā te Atua nō te tīmatanga rā anō mō te ora, i runga i te whakatapu a te Wairua, i runga anō i te whakapono ki te pono.

¹⁴ Ko te mea tēnā i karangatia ai koutou e ia, he mea nā tō mātou rongopai, arā kia whiwhi ki te korōria o tō tātou Ariki, o Īhu Karaiti.

¹⁵ Heoi, e ōku tēina, e tū koutou; kia mau ki ngā whakarereanga iho i whakaakona ai koutou e te kupu, e tā mātou pukapuka rānei.

¹⁶ Nā, mā tō tātou Ariki, mā Īhu Karaiti pū anō, mā te Atua, mā tō tātou Matua, i aroha mai nei ki a tātou, i hōmai nei i te whakamārie mutungakore, me te mea pai e tūmanakohia atu nei, he meatanga nā te aroha noa,

¹⁷ māna e whakamārie ō koutou ngākau, māna koutou e whakaū ki runga ki ngā kupu, ki ngā mahi pai katoa.

3

Me Īnoi mō Mātou

¹ Heoi, e ōku tēina, inoi mō mātou, kia rere te kupu a te Ariki, kia whai korōria, kia pēnā me tēnā i a koutou;

² kia whakaorangia hoki mātou i ngā tāngata pō-auau, i ngā tāngata kino; kāhore hoki ngā tāngata katoa e whakaponu.

³ Otiia, e pono ana te Atua, māna koutou e whakaū, e tiaki i te tangata kino.

⁴ Nā, e ū ana tō mātou whakaaro i roto i te Ariki ki a koutou, kei te mahi koutou, ā, ka mahi anō i a mātou e whakaako nei ki a koutou.

⁵ Mā te Ariki hoki e whakatika ō koutou ngākau ki te aroha o te Atua, ki te ngākau āta tatari o te Karaiti.

Te Herenga kia Mahi

⁶ Nā, ko tā mātou whakahau atu tēnei ki a koutou, e ōku tēina, i runga i te ingoa o tō tātou Ariki, o Īhu Karaiti, mawehe kē i ngā tēina katoa e hē ana te whakahaere, kāhore nei e rite ki ā mātou whakarerenga iho i roto i a rātou.

⁷ E mātau nā hoki koutou ki ngā mea e tika ai tā koutou whakarite ki a mātou; kīhai hoki i hē tā mātou whakahaere i roto i a koutou;

⁸ kīhai hoki mātou i kai noa i te taro i te ringa o tētahi tangata, engari i roto i te mahi nui, i te uaua, me te mahi tonu i te ao, i te pō, kei whakataimahatia e mātou tētahi o koutou.

⁹ Ehara rā i te mea kāhore ō mātou take, engari, kia meinga ai mātou hei tauira mō koutou, kia rite ai tā koutou ki tā mātou.

¹⁰ Anā hoki i a mātou e noho ana i a koutou, ko tā mātou whakahau tēnei ki a koutou, ki te kore tētahi e pai ki te mahi, kaua ia e tukua kia kai.

¹¹ Kei te rongo hoki mātou tērā ētahi e hē ana te whakahaere i roto i a koutou, kāhore rawa e mahi, engari e pokanoa ana ki a ētahi.

¹² Nā, ko tā mātou ako, ko tā mātou whakahau tēnei ki aua tāngata pērā, i roto i tō tātou Ariki, i a Īhu Karaiti, me mahi mārīe rātou, ka kai i ā rātou nā ake kai.

¹³ Ko koutou ia, e ōku tēina, kei ngākaukore ki te mahi pai.

¹⁴ Nā, ki te kore tētahi e ngohengohe ki tā mātou kupu i tēnei pukapuka, kia mārāma te tohu i a ia, kei piri koutou ki a ia, kia whakamā ai ia.

¹⁵ Otiia, kaua e mea he hoariri ia, engari, whakatūpatoria, ānō he teina.

Poroporoaki

¹⁶ Nā, mā te Ariki pū o te rangimārie e hoatu te rangimārie ki a koutou i ngā wā katoa, i ngā mea katoa. Kia noho te Ariki ki a koutou katoa.

¹⁷ Ko te oha āku, a Paora, nā tōku ringaringa ake, ko te tohu ia i ngā pukapuka katoa; he pēnā tāku tuhituhi.

¹⁸ Kia tau te aroha noa o tō tātou Ariki, o Īhu Karaiti ki a koutou katoa.

Te Kawenata Hou

Maori: Maori NT - converted from RTF LAI

copyright © 1952,2008 Bible Society New Zealand Charitable Trust

Language: Māori

Contributor: Bible Society New Zealand

Te Kawenata Hou

Maori New Testament

Bible Society New Zealand

This translation is made available to you under the terms of the Creative Commons Attribution-No Derivatives license 4.0.

You may share, redistribute, or adapt this Bible translation or extracts from it in any format, provided that:

You include the above copyright and source information.

You do not use this work for commercial purposes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-10-16

PDF generated using Haiola and XeLaTeX on 31 Oct 2025 from source files dated 31 Oct 2025

f5251fa7-4780-5900-96bf-6211b45050b2